

**Ն.Ս.Օ.Տ.Տ. ԳԱՐԵԳԻՆ Ա
ԱՄԵՆԱՅՆ ՀԱՅՈՑ ԿԱԹՈՂԻԿՈՍԸ
ԵՆԹԱՐԿՎԵՑ ՆՈՐ ՎԻՐԱՀԱՏՈՒԹՅԱՆ**

Ինչպես հայտնի է, Ն.Ս.Օ.Տ.Տ. Գարեգին Ա Ամենայն Հայոց Կաթողիկոսը, անցած տարվա հոկտեմբեր ամսին Նյու Յորքում կատարված նոր վիրահատությունից հետո, շարունակում էր հետվիրահատական ապաքինման ջրջանն անցկացնել Միացյալ Նահանգներում: Նորին Սուրբ Օծության առողջական վիճակին հետևում էր դոկտոր Ռոյ Սելշոնը:

Վերջերս Վեհափառ Հայրապետը ենթարկվեց լրացուցիչ բժշկական քննության:

Համաձայն փետրվարի 3-ին Մայր Աթոռ Սուրբ Էջմիածնում ստացված հաղորդագրության, որն ուղարկել է Հայաստանյայց Առաքելական Եկեղեցու Հյուսիսային Ամերիկայի հայոց թեմի առաջնորդ գերաշնորհ Տ. Խաժակ արքեպս. Պարսամյանը, տեղեկանում ենք, որ քննության արդյունքում բժիշկները նպատակահարմար են գտել կատարել ևս մեկ վիրահատություն: Վեհափառ Հայրապետի վիրահատությունը նշանակվել էր սույն թվականի փետրվարի 5-ին, ուրբաթ օրը:

Այս կապակցությամբ փետրվարի 4-ին ԱՄՆ մեկնեց Կաթողիկոսական Ընդհանուր Փոխանորդ գերաշնորհ Տ. Գարեգին արքեպս. Ներսիսյանը՝ տեսակցելու Նորին Սրբության հետ:

Վիրահատությունը տեղի ունեցավ փետրվարի 5-ին Նյու Յորքում, որտեղից ուղարկված հաղորդագրությամբ Տ. Խաժակ արքեպս. Պարսամյանը հայտնում է, որ, ըստ գլխավոր վիրաբույժ դոկտոր Ռոյ Սելշոնի, վիրահատությունն անցել է քարեհաջող:

Վիրահատությունից հետո Վեհափառ Հայրապետը, բժիշկների անմիջական հսկողության տակ, կանցկացնի ապաքինման ջրջան: Դոկտոր Սելշոնի գնահատմամբ, Նորին Սուրբ Օծության վիճակը կայուն է: Վեհափառ Հայրապետը հիվանդանոցում կմնա շուրջ տասն օր:

**

**ԱՄԵՆԱՅՆ ՀԱՅՈՑ ԿԱԹՈՂԻԿՈՍՆ ԱՊԱՔԻՆՄԱՆ
ՇՐՋԱՆՆ ԱՆՑԿԱՅՆՈՒՄ Է ՆՅՈՒ ՅՈՐՔՈՒՄ**

Փետրվարի 17-ին Ն.Ս.Օ.Տ.Տ. Գարեգին Ա Ամենայն Հայոց Կաթողիկոսը դուրս գրվեց հիվանդանոցից և շարունակում է ապաքինման

շրջան անցնել նյու Յորքում՝ գլխավոր վիրաբույժ Ռոյ Սեյշոնի անմիջական հսկողությամբ:

Մայր Աթոռ Սուրբ Էջմիածին ստացված հաղորդագրության համաձայն, Հայաստանյայց Առաքելական Եկեղեցու Հյուսիսային Ամերիկայի Արևելյան թեմի առաջնորդ գերաշնորհ Տ. Խաժակ արքեպս. Պարսամյանը տեղեկացնում է, որ կազմույթն շրջանը հավանաբար կտևի 4-6 շաբաթ:

Բժիշկները գոհ ու լավատես են վիրահատության արդյունքներով:

Փետրվարի 19-ին նյու Յորքից Մայր Աթոռ Սուրբ Էջմիածին վերադարձավ նաև Կաթողիկոսական Ընդհանուր Փոխանորդ գերաշնորհ Տ. Գարեգին արքեպս. Ներսիսյանը:

Սրբազան Հայրը ևս հաստատեց Մայր Աթոռ ստացված տեղեկությունները՝ նորին Սրբության ապաքինման ընթացքի և արդյունքների մասին:

Հավատավոր հայ ժողովրդի հետ շարունակենք աղոթել Ամենայն Հայոց Վեհափառ Հայրապետի շուտափույթ ապաքինման և արևշատության համար: